

1 Bakorinto 13:11

“Ntango nazalaki mwana, nalobaki lokola mwana, nazelaki koyeba lokola mwana, nakanisaki lokola mwana; kasi ntango nakómaki moto mokóló, nakitisaki makambo ya bomwana.”

(1 Bakorinto 13:11 – Mokanda na Bomoi)

Na bomoi ya mokolo na mokolo, moto nyonso asengeli koleka na etape mibale ya minene: bomwana mpe bomoto-mokóló. Etape moko na moko esengaka bokambi. Ndakisa, mwana moke akoki te komikamba ye moko, mpo mayele na ye ekómi nanu te na bopelisi mpo na kokabola malamumu mpe mabe, to mpo na kososola mibeko ya bomoi. Yango wana, asengeli kotángama mpe koteyama na baboti to moto oyo abatelaka ye, atako alingi yango to te. Malako wana ekómaka lokola mibeko mpe mitindo epai na ye.

Ndakisa, ntango mwana akómi na mibu motoba to sambo, bamemaka ye na kelasi ezalaka te mpo alingi yango, kasi mpo ezali na ntina mpo na bokóli na ye. Bamusalaka kolamuka ntóngó

nyonso, kosukola mino, mpe kokende kelasi. Mwana moko te alingaka kolamuka ntóngó; mwana alingaka kaka kosakana, kopumbwa-pumbwa mpe kosala oyo esepelisaka ye.

Ndenge moko mpe, ntango azongi na ndako, bamusalaka kolala mwa ngonga, kosukola nzoto, kosilisa misala ya kelasi, bapona bilamba na ye, mpe mbala mosusu baboti bapona ata baninga oyo akoki kosakana na bango. Atosaka mibeko wana te mpo asosoli yango to alingi yango, kasi kaka mpo na kokokisa makambo oyo baboti na ye bazelaka. Soki bapesaki ye bonsomi mobimba, akotikala te kobwaka mikumba nyonso wana mbala moko.

BIZALELI YA MOTO MOKÓLÓ

Lokola mwana azali kokola, mbongwana ebandaka kosalema malembe-malembe kati na ye. Abandaka komona ntina ya kolamuka ntóngó, kosukola mino, kokende kelasi, kosukola nzoto, kopona baninga malamuni, mpe bongo na bongo. Mpo na nini azali kosala yango? Pamba te akómi mokóló mpe asosoli ete makambo wana esalisaka ye ye moko kasi te baboti na ye. Yango nde elembo ya solo ya bomoto-mokóló: kokokisa mokumba uta na motema, kozanga kosalemela na makasi. Na tango wana nde

moboti ayebi ete mwana akómi mokóló mpo na kotyelama motema na bonsomi.

Ndakisa mosusu ezali moyekoli. Na etape ya kelasi ya ebandeli, bamusalaka kokota na mateya nyonso, kolata uniforme, kokoma ba notes, mpe bapunisaka ye soki asali mabe. Kasi na yunivèrsité, mibeko ya makasi wana ezali lisusu te. Mpo na nini? Pamba te yunivèrsité emoni ete moyekoli akómi kososola mokumba na ye. Atako bazali lisusu kosalela ye makasi te, azali kaka koyekola mpe kolonga. Yango elingi koloba te ete yunivèrsité ezangi mibeko; elingi koloba ete moyekoli akómi mokóló mpo na kokokisa yango na bolingo.

LINGOMBA YA NZAMBE MPE ETAPE MIBALE

Ndenge moko mpe, Lingomba ya Nzambe elekáki na etape mibale: bomwana ya molimo mpe bomoto-mokóló ya molimo. Etape ya bomwana ya molimo ezalaki ntango Nzambe abotaki Isalaele na esobe. Lokola bazalaki nanu bana na molimo, basengelaki mibeko mpo na kokamba bango, pamba te bakokaki nanu te kokabola malamumu mpe mabe. Yango wana, Mibeko epesamaki na nzela ya Moize mitindo oyo esengelaki kotosa yango na makasi. Ezalaki te maloba ya kosenga; ezalaki mitindo

ya makasi. Moto akokaki te koyiba, kosala ekobo, koboma, kobuka Saba, to kosambela bikeko. Moto nyonso oyo abukaki mibeko azalaki kopesama etumbu makasi.

Batósaki mibeko wana te mpo balingaki yango, kasi mpo balingaki kosepelisa Nzambe mpe kokima etumbu. Soki bapesaki bango bonsomi, balingaki te kobatela mibeko yango.

Kasi ntango bato ya Nzambe bakómaki na etape ya bomoto-mokóló ya molimo, esengelaki ete mibeko ekomama kati na mitema na bango, mpo ete batosa yango na bolingo, kasi te mpo na makasi ya libándá. Yango esakolamaki kala.

Yelemia 31:31-34

“Talá, mikolo ezali koya, elobi Yawe, oyo nakosala boyokani ya sika na ndako ya Isalaele mpe na ndako ya Yuda... Nakotia mibeko na ngai kati na makanisi na bango, mpe nakokoma yango na mitema na bango... bango nyonso bakoyeba ngai... pamba te nakolimbisa mabe na bango, mpe nakokanisa masumu na bango lisusu te.”

(Yelemia 31:31-34 - Mokanda na Bomoi)

Lisakoli oyo ekokisamaki na Mokolo ya Pantekote, ntango Molimo Mosantu akitelaki bandimi. Na ntango wana, balekaki uta na bomwana ya molimo kino na bomoto-mokóló ya molimo. Mosala ya liboso ya Molimo Mosantu ezalaki kokoma Mibeko ya Nzambe kati na mitema na bango. Yango elingi koloba ete mondimi abandaka kotosa Nzambe na bolingo, kasi te mpo na kotindama na libándá ndenge moko na moyekoli ya yuniversité oyo ayekolaka mpo asosoli ntina na yango, kasi te mpo baboti bamusalaka.

Uta na tango wana, bandimi batikaki kosala ekobo, kasi te mpo Nzambe apɛkisasi yango, kasi mpo bamonaki ete ebebisaka molimo na bango. Batikaki kosambela bikeko, kasi te kaka mpo Nzambe atindaki bango, kasi mpo basosolaki ete Nzambe moko kaka nde abongi kosambelama. Basambelaki Nzambe te lokola rituel, kasi mpo bayebaki bosenga na bango ya kozala na boyokani na Nzambe. Babatelaki Saba lisusu te lokola mokolo moko ya makasi, kasi mikolo nyonso ekómaki Saba mpo na bango, pamba te bazalaki kosambela na Molimo mpe na solo.

Boye, Nzambe akangolaki bango na se ya Mibeko.

Bagalatia 5:18

“Kasi soki Molimo azali kokamba bino, bozali lisusu te na se ya Mibeko.”

(Bagalatia 5:18 – Mokanda na Bomoi)

Baroma 8:2

“Mpo ete mobeko ya Molimo ya bomoi kati na Kristo Yesu ekangoli ngai na mobeko ya lisumu mpe ya liwa.”

(Baroma 8:2 – Mokanda na Bomoi)

Baroma 8:4

“Pona ete boyengebene ya Mibeko ekokisama kati na biso oyo totambolaka te kolanda nzoto, kasi kolanda Molimo.”

(Baroma 8:4 – Mokanda na Bomoi)

Ntina ya Molimo Mosantu ezali oyo: azali kobimisa moto uta na bomwana ya molimo (bowumbu) kino na bomoto-mokóló ya molimo (bonsomi mpe bokóli). Moto oyo alobi: *“Nayibaka te mpo Nzambe apekisaki yango,”* azali kolakisa bomwana ya molimo. Kasi mondimi oyo akómi mokóló alobi: *“Nayibaka te mpo nayebi*

ete ebebisaka molimo na ngai.”

Moto oyo akangami kaka na mokolo moko ya Saba, to oyo akimaka lisumu kaka mpo *“Nzambe alobaki bongo,”* azali nanu na etape ya bomwana ya Mibeko.

Kasi bato oyo Molimo azali kokamba bamonaka bosantu lokola mokumba ya esengo, kasi te kilo. Bakimaka ekobo, bilamba ya soni, bisengo ya mokili, masolo mabe, masanga makasi, mpe bosoto nyonso kasi te mpo na mibeko, kasi mpo balingaka bopeto mpe basosoli ete ezali na litomba mpo na milimo na bango.

Oyo nde elembo ya moto oyo ayambi solo Molimo Mosantu: akokisaka bosantu na bolingo, kasi te na mitindo.

Baroma 8:9

“Kasi bino bozali lisusu te kati na nzoto, kasi kati na Molimo, soki solo Molimo ya Nzambe azali kati na bino. Mpe soki moto azangi Molimo ya Kristo, azali moto na Ye te.”

(Baroma 8:9 – Mokanda na Bomoi)

Boye moninga na ngai, ozali na bomwana ya molimo to na bomoto-mokóló ya molimo? Otondi na Molimo Mosantu to ozali nanu kokambama na lingomba ya bomoto? Luka Molimo Mosantu, pamba te Ye nde elembo ya Nzambe (*Baefese 4:30*). Soki azangi, rapto ezali te.

Nzambe apambola yo.

☐☐ Kóta na chaîne na ngai ya WhatsApp mpo na mateya mosusu ya Molimo:

<https://whatsapp.com/channel/0029Vb6lab8V0tfRqKKY11y>

Share on:
WhatsApp